

6. Rólnik, kiž džěła, dyrbi najprěni wot plodow dóstać.*

7. Zrozyń, što praju; přetož tebi da Bóh we wšim spóznaće.*

8. Wopominaj, zo je Knjez Jězus Khrystus, (kiž je) ze symjenja Davidoweho, wot mortwych wstanyl,* po mojim ewangeliu,**

9. We kotrymž ćerpju hač do putow, jako złóstnik;* ale słowo Bože njeje přiwjazane.**

10. Tuž njesu wšitko wuzwolenych dla, zo bychy tež woni zbóžnosć dóstali, kotraž je w Khrystusu Jězusu, z njebjeskej krasnosću.*

11. Wěrne (je) słowo: smy-li z nim wumrjeli, budźemy tež z nim žiwi.

12. Znjesemy-li (z nim), budźemy tež knježić; jelizo zaprjemy, zaprje tež wón nas.*

Mat. 10, 33; Mark. 8, 18.

13. Njewěrimy-li, wón swěrný wostawa; sebje samoho zapřec njemóže.*

14. Na to dopominaj přisahajo před Knjezom. Njewadž so wo słowa; přetož to njeje k ničomu wužitne, khiba k skazěnu poslušacych.*

15. Pilnje so staraj, zo so doswědčeny wopokažeš Bohu jako njewohańliwy džělaćer, prawje wučo słowo wěrnosće.*

16. Njeswjateho a prózdneho pak so zwiń; přetož (tajcy) jara postupuja k bjezbožnosći,*

17. A jich řeč žerje runja rakej;* mjez nimi staj Hymenaeus a Filetus,

18. Kotraž wot wěrnosće wotpadnyštaj prajicy, zo je wot-mortwych-wstaće so hižo stało, a kotraž někotrych wěru přewrócištaj.*

19. Ale kruty zakład Boži stoji* a ma tuto napismo: „Knjez znaje, kotřiž su jeho“ a „Wotstup wot njesprawnosće kóždy, kiž mjenuje Knjezowe mjeno“.**

zo cyły rjad a wšitke prawidła wobkedžbuje; runje tak njemóže w Khrystusowej službě nihtó krónowany być, khiba zo wšitke winowatosće dokonja. — 6. Rólnik, kotryž džěła, dóstawa tež najprěni wot plodow, ale jeno, hdyž džěła; tak ma tež wučer ewangelia najprěni prawo na njebjeske myto, ale jeno tehdy, hdyž službu derje zastoji. — 7. t. r. zrozyń derje, što přirunanje praji: ty to móžeš, dokelž wot Boha dosć dara dóstanješ. — 8. Zo by Timotheus swěrný a sćerpny džělaćer był, dyrbi so dopomnić na wot-mortwych-wstaće Khrystusa, kotryž byrnje po mjasu Davidowy sy, z tym so wopokaza jako syn Boži a kotryž tež svojim wěriwym zaruči, zo přez njeho nad nje- přecelemi dobudu. ** t. r. po mojej wučbje. — 9. t. r. za čož so ja prócuju a nětko w jastwje ćerpju runja złóstnikkej. ** t. r. runjež sym ja jaty, njeprěstawa rozšěrjenje słowa Božeho; Pawoł wučese Jězusowu wučbu tež před sudom. — 10. Dokelž moje zajeće rozšěrjenju Jězusoweje wučby nješkodži, ale skerje pomha, ćerpju wšitko rady, zo bychy ći, kotřiž su k wěčnej zbóžnosći wuzwoleni, ju přez słyšenje słowa Božeho tež dóstali, a tak z Khrystusom w njebjeskej krasnosći zjednoćeni byli. — 12. Wuzwoleni přińdu k njebjeskej krasnosći, dokelž Bože slubjenje je wěrne: štož z Khrystusom ćerpiwši wumrje, změje z nim tež džěl na wěčnym žiwjenju, a štož z nim kriwdu znjese, budže z nim tež knježić; štož pak jeho zaprje, toho zaprje tež wón před njebjeskim Wótcom. — 13. Hdyž pak jemu wěru zapowěmy, wostanje wón swěrný w svojich slubjenjach a hroženjach, dokelž jako wěčna wěrnosć njemóže njeswěrný być. — 14. Prózdne wurěčowanje škodži wobkrućenju duchowneho žiwjenja. — 15. Budž swěrný džělaćer, kotryž słowo Bože njeprěměnja, ale je prawje wučí. — 16. t. r. z falšnej wučbu rozšěrja so bjezbožnosć. — 17. t. r. tajke bjezbožne wučby kaža druhich, kotřiž je słyša, a ći rozšěrjeju je zaso dale. — 18. Wobaj praještaj, zo ćěla wot mortwych njewstanu, a wučěštaj, zo ma so wšo, štož Khrystus wo horjewstaću praji, wo duchownym wožiwjenju zrozumić, kotrež so we wosprawnenju čłowjeka stawa, hdyž jako duchownje mortwy přez swjatosćacu hnađu znowa wožiwi. — 19. t. r. Khrystusowa cyrkej stoji kruće runja twarej, kotryž je na kruty zakład založeny; někotre kamjenje móža so wuwalić, někotre stawy wotpadnyć, ale cyrkej wostanje kruće stoji, dokelž je založena na wěrnosć. ** Jako mějachu domy wyše duri wěste znamjenja abo napisma zaryte, kotrež na to pokazowachu, k čomu slůža, tak ma cyrkej tež dwoju wěrnosć jako napismo. Přěnja wěrnosć je: „Knjez znaje, kotřiž su jeho.“ We zwjazku cyrkwe su mnozy, kotřiž po wěrje a žiwjenju Knjezowi njesu, ale Knjez jich znaje a rozeznawa wot svojich swěrných, kotřiž su tež po svojim zmyslenju jeho. Druha wěrnosć rěka: „Wotstup wot njesprawnosće kóždy, kiž mjenuje Knjezowe mjeno“, t. r. štož woprawdže ke Khrystusowej cyrkwi slůša, njech so džěli wot kóždeje njesprawnosće a wosebje wot kóždeje falšneje wučby a wot tych, kotřiž ju wuča a rozšěrjeju.